

20 de decembro de 2012. Diante das recentes [manifestacións de Feijóo e Tahoces \(D. X. de Industria\)](#) apoiando os métodos non

convencionais para a extracción de gas en Galiza, ADEGA manifesta o seu total rexeitamento a calquera iniciativa que pretenda utilizar a tecnoloxía coñecida como **"fracking"**

no noso país.

O "fracking" o

u


[fracturamento hidráulico](#)

é unha tecnoloxía desenvolta para a obtención de gas natural en xacementos que non poden ser aproveitados polas técnicas habituais de extracción. No proceso empréganse máis de

[500 produtos químicos](#)

diferentes, moitos deles canceríxenos e mutaxénicos. Os impactos abranguen verteduras ao ar e no medio acuático pero tamén contaminación do subsolo, desfeita da paisaxe e mesmo tremores de terra. Moitas persoas que residan nos territorios con pozos de "fracking" deberán abandonalos

pola insalubridade destas técnicas.



As técnicas de fractura hidráulica profunda para a obtención de hidrocarburos poderían supor unha das maiores **agresións contra o ambiente** e a saúde dos galegos/as. Esta tecnoloxía emprega máis de

[500 produtos químicos distintos](#)

, algúns deles con graves efectos para a saúde humana e ambiental: espumantes, gases comprimidos, ácidos, poliacrilamida para reducir a fricción ou xelificantes con compostos

aromáticos (derivados do benceno), organo-metálicos e outros compostos canceríxenos e mutaxénicos.

Malia a que os xacementos susceptíbeis de seren explotados non son tan abundantes como noutros lugares do estado, a densidade de poboación en Galiza é moi superior a de outras áreas damnificadas por estas prácticas. Alén disto, os principais depósitos de gas susceptíbeis de seren aproveitados por estas técnicas poderían atoparse nos **fondos das rías** e ao longo da plataforma continental galega.

Nas áreas produtoras de gas natural, as técnicas de "fracking" son o último recurso que aplican as multinacionais da enerxía para acabar de espremer un xacemento, que logo abandonan para continuar o seu labor depredatorio noutra área deixando o **territorio devastado e inzado de refugallos tóxicos**.

A Xunta de Galiza, como noutras ocasións, volta a poñerse aos pés das multinacionais entregando o noso territorio ao capital especulativo para que as súas contas de beneficios engorden a costa da desfeita ambiental e social. Está por ver se Feijóo, Tahoces e compañía non rematan a súa carreira política nos consellos de administración dalgunha destas empresas, tal e como aconteceu con González, Aznar, Solbes...

A Xunta de Galiza debería tomar exemplo do **governo de Cantabria (PP)** que vén de aprobar un acordo para buscar fórmulas legais que impidan o desenvolvemento destas técnicas no seu territorio. Dende

ADEGA facémonos eco do acordo da nosa 37 Asemblea e esiximos da Xunta o veto ao "fracking" en Galiza, seguindo o exemplo do goberno cántabro.

Estas prácticas depredadoras son a confirmación de que a actual **crise** ten tamén unha forte compoñente ambiental: Todo vale para espremer até o último gramo de ouro, gas, coltán... a costa de envelenar a terra e a xente. Despois, a colonizar outro territorio deixando a terra erma e os petos dos especuladores e políticos corruptos cheos.

Ligazóns de interese: <http://fracturahidraulicano.info/>
<http://frackingezaraba.org/> <http://navarraantifracking.blogspot.com.es/> <http://frackingno.wo>

rdpress.com/
[//frackingteruel.blogspot.com.es/](http://frackingteruel.blogspot.com.es/)

[http:](http://)